

通園叢書

張宗祥



通國書

吳昌碩



唐大詔令集卷第二十七

宋 宋敏求編

皇太子

立太子

立秦王爲皇太子詔

立中山王爲皇太子詔

立晉王爲皇太子詔

立代王爲皇太子詔

立平王爲皇太子詔

立郢王爲皇太子制

立忠王爲皇太子制

立宣王爲皇太子制

立廣陵郡王爲皇太子制

立鄧王爲皇太子制

立遂王爲皇太子制

立景王爲皇太子制

立魯王爲皇太子制

立陳王爲皇太子制

立德王爲皇太子制

立秦王爲皇太子詔

儲貳之重式固宗祧一有元良以貞萬國天策上將太尉尙書令陝東道大行臺尙書令益州道行臺尙書令雍州牧蒲

州都督領十二衛大將軍中書令上柱國秦王某器質冲遠
風猷昭茂宏圖昔著美業日隆孝惟德本周於百行仁惟任
重以安萬物王迹初基經營締構戡翦多難征討不庭嘉謀
獨舉長算必剋敷政大邦宣風區奧功高四履道邇二南任
總機衡庶績惟允職兼內外彝倫載穆遐邇屬意朝野具瞻
宜承鼎業允膺守器可立爲皇太子所司具禮以時冊命

武德

九年
六月

立中山王爲皇太子詔

尙書奏議以爲少陽作貳元良治本虔奉宗祏式固邦家中
山王承乾地居嫡長天姿岐嶷仁孝純深業履韶茂早聞叡
哲幼觀詩禮允茲守器育養春宮朕欽承景業嗣膺寶圖憲

則前王思隆正緒宜依眾以答僉望可立承乾爲皇太子
武德九年十月

立晉王爲皇太子詔

昔者哲王受圖上聖垂範建儲貳以奉宗廟總監撫以寧邦
國旣又在於至公亦事兼於權道以賢而立則王季興周以
貴而升則明帝定漢詳諸方冊豈不然乎并州都督右武侯
大將軍晉王治地居茂親才惟明德至性仁孝淑哲惠和夙
著夢日之祥早流樂善之譽好禮無倦強學不怠今承華虛
位率土繫心疇咨文武咸所推戴古人云知子莫若父知臣
莫若君朕謂此子實允眾望可以則天作貳可以守器承祧
永固百世以貞萬國可立爲皇太子所司備禮冊命

貞觀十七年四月

月

立代王爲皇太子詔

洊雷揚祉承祧之道爰著重離闡曜守器之方斯存故能撫
寧軍國永保邦家詳覽瑤圖緬瞻遐冊繼業垂統咸率茲典
代王弘地居嫡胤天縱英姿器質沖華神鑒昭遠恭謙表志
仁孝居心夙彰睿哲之心早通詩書之業朕以虛薄方啟無
疆之祚永傳不朽之基取則前王思隆正緒宜升上嗣養德
東宮可立爲皇太子仍令所司擇日備禮冊命

永徽七年正月

立平王爲皇太子詔

舜去四凶而功格天地武有七德而戡定黎人故知有大勳
者受神明之福仗高義者爲上國之主朕恭臨寶位亭育寰

區以萬物之心爲心以兆人之命爲命雖承繼之道咸以冢
嫡居尊而無私之懷必推功業爲首然後可保安社稷永奉
宗祧第三子平王隆基孝而克忠義而能勇比以朕居藩邸
虔守國彝貴戚中人都無引接羣邪害正凶黨實繁利口巧
言讒說罔極韋溫延秀朋黨竟起晉卿楚客交構其間潛結
回邪排擠端善潛貯兵甲將害朕躬隆基密聞其期先難發
奮挺身鞠旅眾應如歸呼吸之間凶渠殄滅安七廟於幾墜
濟羣生於將隕方殍之功過四比武之德逾七靈祇望德昆
弟樂推一人元良萬邦以定爲君副者非此而誰可立爲皇太
子有司擇日備儀注冊命

唐隆元
年六月

立郢王爲皇太子制

樹之后王所以輯寧黎獻承之儲副所以安固宗祧故能崇
四術之科爲萬邦之本長幼君臣之序齒胄知歸溫文恭敬
之風羣生攸屬古之制也其在茲乎郢王嗣謙聰睿夙成端
莊特秀三雍禮樂必也生知五官詞藻居然暗合體道爲器
非假於學問資靈受德自符於神解夏弦春頌地義天經立
人之道旣彰爲子之誠益著今升平在運中外咸寧將有事
於元良固不踰於三善宜光近日之敏俾則前星之耀宜以
來年正月四日備禮冊爲皇太子所司準此

開元二年十
二月十七日

立忠王爲皇太子制

孫逖

門下大寶曰位實在乎丕承萬邦以貞必見於明兩朕嗣守
鴻業祇嚴永圖恭惟七鬯之主豈捨人神之望開府儀同三

司兼單于大都護河北河東行軍元帥朔方軍節度使兼關
內度支營田鹽池押諸藩部等大使上柱國忠王璵天假聰
明生知仁孝君親一致孝悌三成溫文之德合於古訓敬愛
之風聞於天下嘗亦視其所以察其所安考言有章詢事皆
中知子者父允叶於元良以長則順且符於舊典宜膺擇嗣
之舉俾受升儲之命可立爲皇太子仍取來月內擇日冊命

所司準此

開元二十六年六月三日

立宣王爲皇太子制

主器者莫若長子繼明者必建儲貳旣已傳重亦以崇本則
君親之大義帝王之弘範無先於此矣朕以眇身纘承丕緒
夕惕祇畏惟懷永圖承八葉之耿光居四海而稱大則七鬯

之主秦盛之重樹元貴嫡有邦之先宣王誦生知古訓既賢
且長聰明敏博溫恭孝友不自滿假率由憲章慶發高祿兆
申甲觀爲子之道惟父能知審觀其志宜承大統固能總戎
監撫載乎鼎寶不絕馳道謙敬益崇問安必自於因心入學
固知其讓齒昇茲上嗣庶貞萬國可立爲皇太子宜令所司
擇日備禮冊命

建中元年正月

立廣陵郡王爲皇太子制

鄭 綱

萬國之本屬在元良主器之重歸於長子所以固社稷正邦
統古之制也廣陵郡王純孝友莊敬慈仁忠恕博厚以容物
寬明而愛人祇服訓辭文皆合雅講求典禮學必承師居有
令問動無違德朕獲纘丕緒祇若大猷惟懷永圖用建儲貳

以承宗廟以奉粢盛爰舉舊章仍俾茂典宜冊爲皇太子改名統仍令有司擇日備禮冊命

正元二十一年三月

立鄧王爲皇太子制

門下朕聞君天下者纘承統業何嘗不樹建儲貳安固邦家況長子有主器之義元良貞立國之本上以嚴宗社之重下以順恆久之宜歷考前載率由斯道鄧王寧性與忠敬生知孝友秉寬仁之度體慈愛之心學師訓謨詞尙經雅動皆中禮慮不違仁稽以舊章允膺上嗣朕獲纘丕緒夙夜虔躬常懼神祇未歆政禮多闕曠茲茂典亟涉歲時今屬方內俯寧品物咸遂覽皇王之制詢卿士之謀時瞻大猷莫此爲甚是用授之匕鬯位以青宮欽惟永圖俾奉休命宜冊爲皇太子

令有司擇日備禮冊命主者施行

元和四年四月

立遂王爲皇太子制

門下承廟祧之尊固邦家之本重其緒業貞以元良斯今古之通制也乃者春宮曠位已涉歲時裸獻闕主鬯之儀膠庠虛齒學之道其何以億寧方夏彰爾教源稽諸往冊用舉彝典遂王宥孝敬忠肅寬明惠和遵保傳之言佩經訓之旨友於兄弟睦於宗親博愛而恕己以誠慎行而飭躬以禮載觀所履克慎厥謀宜升儲闈以對休命朕祇若承憲惟懷永圖法三王垂統之規紹十聖重光之烈致嚴禋配俾奉粢盛式昭上嗣之崇庶叶明離之吉宜冊爲皇太子改名恆仍令有

司擇日禮備冊命主者施行

元和七年十月

唐大誥卷二十一
立景王爲皇太子制

門下朕聞王者敬承宗祧欽若天命必建元子用寧邦家所以光叶繼明嚴當主鬯朕纘承聖緒寅奉丕圖惟懷國本之安爰在皇儲之重而青宮久曠望苑未開何以表式元良昭宣鴻業稽於往冊用舉彝章長男景王湛孝愛恭和忠敬誠肅慈惠特稟寬仁夙彰言通典謨動合儀矩睦友宗屬遵承傳道克修令問日茂佳猷宜踐儲闈以承庥命君尊父嚴每推乾道聞詩學禮用首人倫嘉翼翼於誠心覩蒸蒸於孝敬古稱知子無讓前修俾奉棗盛式昭元嗣宜冊爲皇太子有司擇日備禮冊命主者行施

長慶二年十一月十七日

立魯王爲皇太子制

禮重承祧義承繼體恩崇守器必務建儲王者所以固大本而貞萬國也魯王允溫仁寬明聰敏孝敬動合至性居無放心樂善承顏曠度容眾恭勤詩書之教率由忠厚之風懿茲猷光我胤嗣朕纂承寶位丕寧永圖欽若舊章用建儲貳爰俾主鬯以率問安統正龍樓之榮昭宣甲觀之兆宜膺茂典允屬元良宜冊爲皇太子宜令所司擇日備禮冊命

太和七年

立陳王爲皇太子制

門下古先哲王之有天下也何嘗不正國本而承天序建儲貳而主重器朕以寡昧祇荷丕圖嚴恭寅畏思固洪業慎擇令懿曠於旬時而卿士獻謀龜筮告吉以爲少陽虛位願舉

盛儀列聖垂休俾合予志選賢而立式表無私敬宗皇帝第
六男陳王成美天假忠孝日新道德溫文合雅謙敬保和裕
端明之體度尙詩書之辭訓言皆中禮行不違仁是以順考
舊章欽若成命授之匕鬯以奉粢盛宜回朱邸之榮俾踐青
宮之重可立爲皇太子宜令所司擇日備禮冊命

開成四年
十月十四

日

立德王爲皇太子制

我國家上法夏殷遠遵漢魏爰設儲貳式固宗祧旣明兩而
作離在立嫡而惟長矧茲冲眇獲嗣丕基將弘永圖宜舉令
典德王祐朕之元子孝敬日躋早茂溫文克彰岐嶷屬者朝
廷多故兵革尙興懷柔方務於舞干典禮未行於主器而忠

臣獻議百辟上言請建元良至於三四以奉祖宗之彝教必在前星係億兆之人心宜崇嗣體由是考彼史冊詢於著龜厥惟舊章乃建嘉命爾其嚴奉師傅敬慎威儀必使流慶萬邦垂芳三善稟教諭之道作圖牒之祥勿怠令猷克光帝載服我明訓永孚于休可冊爲皇太子仍改名裕令所司擇日備

禮冊命

乾寧四年正月